

古今文綜

野居書齋

古今文綜 第二部 書牘贈序之屬

第十四冊

目錄

第二編 贈序類

第二章 別序之作法

(甲)稱頌

唐韓愈送竇從事序

唐韓愈送水陸運使韓侍御歸所治序

唐韓愈送李愿歸盤谷序

清李良年送朱方菴之官峨眉序

清洪亮吉送翰林院侍讀吳穀人先生乞養歸里序

清朱仕琇送筠園之京師序

清梅曾亮贈林侍郎序

清梅曾亮送韓珠船序

清張裕釗送湘鄉相國曾公之任直隸總督序

(乙)規勉

唐韓愈送許郢州序

唐柳宗元送徐從事北遊序

宋歐陽修送徐無黨南歸序

明宋濂送東陽馬生序

明宋濂送許時用還越中序

清計東送文與也序

清方苞送劉函三序

清方苞贈宋西狂序

清姚鼐贈孔撝約假歸序

清洪亮吉送汪劍潭南歸序

清方履籛送趙林一序

清邵懿辰贈陳蓺叔序

清管同送聯司馬序

清曾國藩送劉椒雲南歸序

清王詒壽送譚仲儀之皖序

清張裕釗送李佛生序

(丙)解慰

唐韓愈送王秀才序

唐韓愈送何堅序

唐韓愈送孟東野序

宋歐陽修送楊寘序

宋王安石送胡叔才序

宋曾鞏送李材叔知柳州序

清汪琬送胡生序

清胡天游送馬力畚序

清洪亮吉送同年張問陶乞假歸潼川序

清劉大槐送姚姬傳南歸序

清彭兆蓀送樂元淑歸臨川序

清劉開贈左筐菽序

清劉履芬送徐洽之返里序

清李慈銘送潘孺初還文昌序

(丁)感慨

唐韓愈送湖南李正字序

明歸有光送夾江張先生序

清梅曾亮贈余小坡敘

(戊) 諷諭

唐王維送龜監還日本國序

唐韓愈送董邵南序

唐韓愈送幽州李端公序

唐韓愈送鄭尚書序

(己) 發揮

宋歐陽修送王聖紀赴扶風主簿序

宋曾鞏送丁琰序

明歸有光送崑山縣令朱侯序

清姚鼐贈錢獻之序

清張海珊送張少淵試禮部序

清梅曾亮送周石生序

清曾國藩送周荇農南歸序

清曾國藩送唐先生南歸序

清馮志沂送朱伯韓序

清張裕釗贈范生當世序

清吳汝綸送張廉卿序

清吳汝綸送曾襲侯入覲序

古今文綜

第二部

書牘贈序之屬

第十四冊

杭縣張 相讓錄

杭縣姚漢章閱訂

第二編 贈序類

第二章 別序之作法

君子贈人以言。必有其所以言者焉。泛應曲當。輒然於人人之心。使施者不夸。而受者彌愜。大易所由擬以蘭臭。荀子所以比於金珠也。約其作法。析爲六類。

(甲)稱頌

聲聞過情。君子所恥。大抵述其事業。羨其境遇。無溢量。無浮詞。斯非導諛貢媚者比也。錄昌黎送竇從事以下文凡九首。

唐韓愈送竇從事序

踰。甌。閩。而。南。皆。百。越。之。地。於。天。文。其。次。星。紀。其。星。牽。牛。連。山。隔。其。陰。鉅。海。敵。其。陽。

是維島居卉服之民風氣之殊著自古昔唐之有天下號令之所加無異於遠近民俗既遷風氣亦隨雪霜時降癘疫不興瀕海之饒固加於初是以人之之南海者若東西州焉皇帝臨天下二十有二年詔工部侍郎趙植爲廣州刺史盡牧南海之民署從事扶風竇平平以文辭進於其行也其族人殿中侍御史牟合東都交遊之能文者二十有八人賦詩以贈之於是昌黎韓愈嘉趙南海之能得人壯從事之答於知我不憚行之遠也又樂貽周之愛其族叔父能合文辭以寵榮之作送竇從事少府平序

唐韓愈送水陸運使韓侍御歸所治序

六年冬振武軍吏走驛馬詣闕告饑公卿廷議以轉運使不得其人宜選才幹之士往換之吾族子重華適當其任至則出贓罪吏九百餘人脫其桎梏給耒耜與牛使耕其傍便近地以償所負釋其粟之在吏者四十萬斛不徵吏得去罪死假種糧齒平人有以自效莫不涕泣感奮相率盡力以奉其令而又爲之奔走經營

相原隰之宜。指授方法。故連二歲大熟。吏得盡償其所亡失四十萬斛者。而私其贏餘。得以蘇息。軍不復饑。君曰。此未足爲天子言。請益募人爲十五屯。屯置百三十人。而種百頃。令各就高爲堡。東起振武。轉而西過雲州界。極於中受降城。出入河山之際。六百餘里。屯堡相望。寇來不能爲暴。人得肆耕。其中少可以罷漕輓之費。朝廷從其議。秋果倍收。歲省度支錢千三百萬。八年詔拜殿中侍御史。錫服。朱銀。其冬來朝。奏曰。得益開田四千頃。則盡可以給塞下五城矣。田五千頃。法當用人七千。臣令吏於無事時。督習弓矢。爲戰守備。因可以制虜。庶幾所謂兵農兼事。務一而兩得者也。大臣方持其議。吾以爲邊軍皆不知耕作。開口望哺。有司常僦人以車船。自他郡往輸乘沙逆河。遠者數千里。人畜死蹄踵。交道費不可勝計。中國坐耗。而邊吏恆苦食不繼。今君所請田。皆故秦漢時郡縣地。其課績又已驗白。若從其言。其利未可遽以一二數也。今天子方舉羣策以收太平之功。甯使士有不盡用之歎。懷奇見而不得施設也。君又何憂。而中臺士大夫亦同言侍御韓君。

前領三縣紀綱二州奏課常爲天下第一行其計於邊其功烈又赫赫如此使盡用其策西北邊故所沒地可指期而有也聞其歸皆相勉爲詩以推大之而屬余爲序。

唐韓愈送李愿歸盤谷序

太行之陽有盤谷。盤谷之間。泉甘而土肥。草木叢茂。居民鮮少。或曰。謂其環兩山之間。故曰盤。或曰。是谷也。宅幽而勢阻。隱者之所盤旋。友人李愿居之。愿之言曰。人之稱大丈夫者。我知之矣。利澤施於人名。聲昭於時。坐於廟朝。進退百官。而佐天子出令。其在外。則樹旗旄。羅弓矢。武夫前呵。從者塞塗。供給之人。各執其物。夾道而疾馳。喜有賞。怒有刑。才峻滿前。道古今而譽盛德。入耳而不煩。曲眉豐頰。清聲而便體。秀外而惠中。飄輕裾。翳長袖。粉白黛綠者。列屋而閒居。妬寵而負恃。爭妍而取憐。大丈夫之遇知於天子。用力於當世者。之所爲也。吾非惡此而逃之。是有命焉。不可幸而致也。窮居而野處。升高而望遠。坐茂樹以終日。濯清泉以自潔。

採於山。美可茹。釣於水。鮮可食。起居無時。惟適之安。與其譽於前。孰若無毀於其後。與其樂於身。孰若無憂於其心。車服不維。刀鋸不加。理亂不知。黜陟不聞。大丈夫不遇於時者之所爲也。我則行之。伺候於公卿之門。奔走於形勢之途。足將進而趨。口將言而囁。處污穢而不羞。觸刑辟而誅戮。微倖於萬一。老死而後止者。其於爲人。賢不肖何如也。昌黎韓愈聞其言而壯之。與之酒而爲之歌曰。
盤之中。維子之宮。盤之土。維子之稼。盤之泉。可濯可沿。盤之阻。誰爭子所。窈而深。廓其有容。繚而曲如往而復。嗟盤之樂兮。樂且無央。虎豹遠跡兮。蛟龍遁藏。鬼神守護兮。呵禁不祥。飲且食兮。壽而康。無不足兮。奚所望。膏吾車兮。秣吾馬。從子於盤兮。終吾生以徜徉。

清李良年送朱方菴之官峨眉序

山川之與歌詠。相遭非偶然也。昔人稱蜀山之奇甲天下。而峨眉又爲蜀山之最。然唐宋以來。詩人之久於蜀者。莫如子美。蜀人之能詩者。莫如子瞻。而兩人皆不

得登峨眉。蓋子美身經天寶之亂。流離顛悴。雖其在蜀。最久所履十數地。然皆在蜀東北。而未暇一至西南。子瞻固蜀人。自登仕而後。僅以明允武陽君艱一再返鄉里。自此不復至蜀矣。然則兩公之不得登峨眉。抑若有數焉。而茲山之奇秀。無由紀載於篇什。以此知山川歌詠之相遭。若此其不易也。朱進士方菴以司李改官得蜀之峨眉。令以去。峨眉縣小而僻。爲令者所不樂居。而進士平生讀書懷古。一反俗吏之爲。嘗注杜詩於諸家紕繆多所是正。又好讀子瞻之詩。今得是邑。識者以爲有先幾焉。峨眉二山並峙而爭勝。青衣江出其下。俯視平羌。蓋綿亙者千有餘里。而縣治實當其麓。肩輿朝發而夕可至。君之所遭。視兩公爲獨厚矣。今宇內和樂。旣非若子美之身經變亂。而君以爲政之餘。從容登眺。亦豈子瞻之長去其鄉國者所敢望哉。然則他日者徘徊二峯之間。對積雪之森寒。覩岷江之浩蕩。必有發爲歌詠以補兩公所不逮者。山靈有知其亦可無憾於寥寂也夫。

清洪亮吉送翰林院侍讀吳穀人先生乞養歸里序

嘉慶二年三月上巳日。吾友翰林院侍讀吳君。乞養南歸。其同歲生洪亮吉。招同志之朋。乘入直之暇。餞之於卷施行館。於時嘉樹百本。紅猶未敷。春蕪一畦。綠尙難藉。弋連林之鳥。釣深澗之魚。天目之筍。云惟土膏。山陰之樽。不殊家釀。爰舉觴而送之。曰。君之歸也。有五樂焉。鬢縱頒白。衣猶純采。陟岵陟屺。三詩合歌。倚門倚閭。二老咸在。集申申之羣。從慶皤皤之黃髮。伯始之宦。旣達。呼之以名。文度之年。雖長。登之於膝。此則五十而慕。視猶折蓂之時。八旬有奇。健逾遺種之叟。其樂事一也。比二千石。可云尊官。垂三十年。鬱爲前輩。陳宗之校。東觀旣在。孟堅之前。桓郁之授。禁中。僅處仲弓之後。又況楚遊設醴。正待穆生。東平奏牋。首推李育。子虛大人之賦。上客傳觀。甘泉洞簫之篇。貴人成誦。甚或賦西池之句。寵蹶始行。設東都之帳。惜其欲去。其樂事二也。未離交道之廐。已置當時之驛。青齊才士。佇望其前。旌廣陵達官。預開乎曲宴。牛腰之軸。堆案而索題。魚腹之書。封緘而俟啟。瓜步尙遠。垂虹之舫。已迎蘇臺。旣離如龍之馬。尙送莫不相見恨晚。圍觀若仙。其樂事

三也。百川奔注。東海是曰歸墟。羣才挺生。曲江實惟都會。西則三江五湖。南則八閩百粵。陸路之馬。多如風鴉。水程之帆。密若星顆。離亭折柳。手倦於攀。條紫陌。賞花目迷於辨色。交友盡一世。曾未越乎門庭。爲客設八珍。要不離乎水土。其樂事四也。以視膳之暇。爲著書之期。左思旣敗之筆。雜貯案頭。管寧未銳之榻。不離門右。籠鵝館闢。偶爾習書。步崔汀長。卽供覓句。孔鯉之經學。多得於過庭。揚雄之法言。半成於閉戶。其樂事五也。僕自惟孤露之餘。忝宦百僚之末。然非天下之士。不交。非經世之書。不讀。堆案數尺。書淫自嗤。臨墀百觴。酒悲不免。惟此數子。庶幾同心。賴國武之盡言。成蘧瑗之寡過。永此夕朝。藉慰離索。乃今者西行數騎。險欲上天。東去一帆。勢將及海。罵田蚡之坐已。乏酒狂。移江敷之牀。將排俗客。弔影自處。攢眉無聊。繁花紅於窖中。春艸青於屋上。視此風土。彌懷鄉里。行亦買艇十尺。驅車兩輪。歸休於吳。訪子入越。茅容殺雞。雖不及客。范式醞酒。或當迎賓。山川渺然。來往無閒。此則向西而笑。咸有待於他時。徂南之思。庶無忘乎歸宿云爾。

清朱仕琇送筠園之京師序

物本於近。而以相去爲大。水沸去山。其大爲瀆。入海而無涯。其去愈遠。木萌近地。漸去而喬。其實爲果。爲藥。以時去。故枝而之人。以齊百味。已病。癘用壽。天下故木之功。成百草。蔬亦然。蟲之類。有鱗羽毛介。齧草栖木。飲水以爲生。其族靈異。則愈去。人感而來止。史則瑞之。居貨者去。速而富。富家之聚金。去礦玉。去璞。象犀齒角。去體。用賄天下人之生。去體爲子。漸遠數世。而其生愈蕃。物莫不以去爲功也。家兄筠園。入貢太學京師。始去幽閒。而就昭明。案衍澶曼。未知其卒。則予始怖於其大也。臨行。出餞十里之郊。親知交坐。酌酒道上。推本萬物之情。以張其去。不戀戀兒女子之感。以爲昧於理也。

清梅曾亮贈林侍郎序

國家歲漕東南粟。以給京師。而江蘇供其半。水運道四千里。夫役平賈。關津轉般費。運官及丁。皆取給州縣吏。吏不能給。則取贏於民田之兩稅。取贏不可以正告。

也。則視民之強弱爲取之薄厚。而單戶益重。困又不幸。風雨收穫之不時。官民望空而責漕者益急。乃假貸息錢。及所主守乾沒。以集事故。州縣吏失足一蹉跌。沒齒不振。卽不若是。歲暮漕事起。皆懷冰臥薪。惴不自保。民事一切。修廢利害。孰可緩急。輕重。漫不敢訾問。春氣動。糧舟畢行。始僚友相賀。勞得保符印。幸今歲無事故。漕事之病於吏治者。往往有是。惟明哲公溥。體國之重臣。深權密幾。調陰劑陽。使官不病民。漕不病官。皆優游寬舒。應務有餘。然後能勤民急公。豐財利衆。禮俗達而政教成。中丞林公之巡撫江蘇也。時則九十月交。寶穡將薦。報災過期而下。鴻自天漂。我中田渾渾。泡泡穀沈穗漂。田叟悼心。官吏灰氣。公乃破成例。告災。請減漕數。其書深婉震動。蓋陸忠宣蘇文忠之論事。再見於唐宋之後。是豈務盡下爲名高哉。下不可病民。上不可病官。寧權濟於一時。而不敢耗國家豐豫之氣。大臣之用心。固宜如此也。故能上動天鑒。下蘇民生。官清吏安。家老甘寢。連年以來。嘉生順成。風魚不災。貨商流貽。疵厲寢伏。人知公撫吳之勤。休聲美實。洋溢義衍。